

COMENTARIO

PALABRA TA NA HULANDA?

Siman pasa Eerste Kamer tambe a duna su aprobacion na cambian den Statuut y asina pues a habri caminda pa cambian estatal a termino corto. Analizando loke a wordo presenta pa e diferente politiconan tanto di Aruba, di Antillas como di Hulanda durante ultimo dianan, no por scapa di e impresion, cu palabra awor ta na Hulanda, cu realmente tin tur rienda den su man.

Asina ta Hulanda, cu lo bay mira si e fecha di Promer di Januari 1986 ta alcanzable pa introduccion di Status Aparte y ta Hulanda ta bay duna garantia pa e proceso di independencia, den cual promesanan a wordo haci encuanto un Gemenebest, areglonan, etc.

Francamente bisa, e solo hecho cu tin cierto asuntonan cu ta den man di Hulanda; y e indicacion cu palabra ta na Hulanda, ta causa cerca nos cierto temor. Esaki pa e simple motibo, cu nos no por kere mucho den e palabra di Hulanda, cu na varios ocasion a inspira e pensamiento cu e no ta semper para, tras palabranan cu e ta papia.

E duda den e palabra Hulandes tin su raiz den e actitud cu semper Hulanda a desplega enfrente su colonianan, ora cu un sonrisa, un "golden handshake", pa no lubida un botter di champagne si ainda tabata tin oportunidad, Hulanda a despedi di su otro colonianan. Nos duda den Hulanda a crece ora durante ultimo añanan, constantemente por a mira con Hulanda tabata dera gay, y Ministro de Koning tabata bini Aruba pa dal clabo ariba cabez, pero semper a logra di no encontra e clabo pa por a dale ariba su cabez.

Ta e actitud di Hulanda, su falta di un postura firme cu ta inspira confianza real, ta haci cu na nos parecer, ora ta papia cu Hulanda mester existi cierto cosnan cu un garantia cu ta algo mas cu un promesa. Esaki no pasobra nos ta kere cu sin e Gemenebest cu awor Hulanda aparentemente ta propaga, Aruba lo no sobrebibi, pero simplemente pa motibo, cu ta justamente e promesanan di Hulanda ta haci cu nos ta traha den un direccion, pa despues wordo confronta cu e necesidad di cambia rumbo, pa por sigui nabega tras di e bapor di Piet Hein.

E fecha pa Status Aparte no a wordo yena. Tur hende sabi, cu cambio di Statuut tabata encera cu Independencia tabata e objetiva real, y cu Status Aparte ta un fase transitorio. Pero e fase aki ta di importancia vital, comoquiera cu ta pa años Aruba a lucha pa yega na e momento cu e ta bira un pais den Reino Hulandes. Lo ta normal, cu for di awor ta estableci cu dia Promer di Januari 1986 Aruba ta haya su Status Aparte. Pero no! Na October lo bay averigua con leo trabaonan ta, con ta para cu preparacionnan pa Hulanda dicidi ariba cual fecha lo introduci Status Aparte.

No por scapa for di e impresion cu Hulanda ta sigui mira Aruba manera un mucha sin mucho inteligencia, cu no por dicidi pa su mes kico ta bon pe y con e mester biba. E solo hecho, cu Hulanda ta haya necesario pa convoca un reunion, caminda for di awor por pronostica cu e voz Hulandes lo ta esun cu lo resona mas fuerte, ta subraya loke for di momento cu a cambia Statuut pa introduci autonomia a refleha: nos ta partnernan igual den Reino, pero Hulanda ta poco mas inteligente, poco superior, poco mihor cu De West.

Palabra ta na Hulanda? Nos ta pensa cu si. Paso-bra e hecho cu Hulanda kier reserva e fecha definitivo pa Status Aparte, ta haci e derecho pa un pais dicidi libremente encuanto su futuro un farce. Ademas Hulanda mester comprende cu e unico

FECHA DI ELECCION LO DEPENDE DI APROBACION NA CAMBIO DI STATUUT

ORANJESTAD(AAN)—E fecha definitivo pa eleccion di representantenan di Pueblo cu lo mester bay forma e promer colegio ejecutivo di e pais Aruba tambe, lo por depende di e resultado di tratamiento di cambio di Statuut den Parlamento di Aruba.

Segun informenan cu DIARIO a ricibi, por spera pa cu pa inicio di Juli, Consejo Insular di Aruba lo reuni pa trata e cambio di statuut. Lo mester por conta cu un mayoria di dos tercera parti durante e reunion pa e cambio wordo introduci. Si esaki no ta e caso, Gezaghebber lo mester disolve Consejo Insular y convoca eleccion nobo.

Asina pues e representantenan cu lo wordo escogi den e eleccion, lo por trata e cambio di Statuut. En vista e hecho cu e

posibilidad ta keda existi cu lo mester convoca dos eleccion, aparentemente lo bay dicidi pa trata e cambio di Statuut promer y despues dicidi ariba e fecha di eleccion. Si no tin dos tercera parti pa sostene cambio, e eleccion lo por sirbi dos proposito, esta forma un colegio nobo a base di e necesidad pa trata e cambio di Statuut y alavez permiti pueblo asina asigna su representantenan cu lo bay forma parti di e promer constelacion di Staten di Aruba.

Si cambio di Statuut conta cu aprobacion di dos tercera parti, e eleccion lo ta solamente dirigi ariba e eleccion di representantenan pa forma parti di e Colegio Legislativo di pais Aruba.

E fecha di eleccion lo mester wordo estableci

den Consejo Insular di Aruba, a base di e areglo pa e fase transitorio, cu ta stipula cu e colegio legislativo lo ta encarga cu stipulacion di fecha pa eleccion.

Mientrastanto hecho ta keda cu e margen di tempo pa convoca eleccionnan ta bira mas corto. Den esaki no mester tene cuenta solamente cu e tempo estipula pa ley pa loke ta trata ciere di registro electoral y entrega di listanan, pero tambe cu e labornan cu eleccionnan ta significa pa e departamento di censo cu ta encarga cu e preparacionnan.

"E posibilidad pa eleccion wordo teni na September ta birando cada dia mas scur" ta e comentario cu DIARIO a haya di un fuente clave y ta e informe cu mas ta aparenta di ta cuadra cu e actual realidad.

HOSPITAL LO PAGA DEBE DI CONSTRUCCION NA FORMA ADELANTA

ORANJESTAD(AAN)—Hospital Horacio Oduber tabata tin un debe cu Gobierno Insular encuanto pago di gastonan di construccion.

E debe tabata wordo cancela na termino, pero

na cierto momento Gobierno lo a pidi Hospital pa sondea e posibilidad pa paga e debe awor.

Mientras segun e areglo bieu, hospital tabata tin 7 aña pa cancela e debe,

a logra yega na un acuerdo pa paga e sumanan concerni na forma adelanta.

Esey ta encera cu e pagonan lo bay poco poco pero ariba un termino mucho mas corto.

VENTA PUBLICO DI LAGO MARCA PA PRIJS ABAO

ORANJESTAD(AAN)—E venta publico cu a wordo teni na Lago, lo ta topico di conversacion awe ora relato keda entrega na gerencia di Lago.

Aparentemente hopi di e material cu tabata na venta a wordo bendi, pero na hopi ocasion e prijs lo tabata sumamente abao. Esaki mester tabata un

atraccion especial, comoquiera cu a tuma dos dia pa bende e material cu tabata na venta.

Awe pues lo bay discuti e venta, ora cuenta wordo duna na Lago.

Informantenan a bisa DIARIO cu un grupo representativo di nos comunidad a haci uso di e ocasion pa cumpra material na prijs di baratillo.

Ta wordo calcula cu un parti di e material lo wordo poni na venta atrobe, sea den exterior.

ayudo cu e por duna Aruba pa Aruba por forma su base financiero pa futuro, no ta un ayudo di presupuesto den cual e por sigui dicta, pero un masterplan. Si tanto aña pasa un Masterplan a sirbi Hulanda, awe e lo sirbi Aruba.

Analizando pues loke a keda presenta ultimo dianan, mester bisa cu Hulanda lo tin e ultimo palabra. Bibando cu e pensamiento aki, solamente por spera cu nos lo ta e excepcion cu lo marca e regla Hulandes, y cu den nos caso, Hulanda lo tin palabra.